

Ogni  
can  
mena la  
coa,  
ogni  
mona  
dise la  
soa.

# Discursi da ostarìa

Dio  
manda  
el fredo  
secondo  
i pani

Cuotidiano che vien fuora ogni tanto, che scolta, conta e smentisse tuto

DIREZION, REDAZION, AMINISTRAZION, STANPARÌA, VÈNDIA, LUOGO DE NÁSSITA, MAGAZIN: TUTO DA PESSATI



128 Venere al  
Circolo

————— Silvano

Prova a imaginarte na cantante brava, bela e co na ose calda, che interpreta tute le canzon, anche le pi difficili, come no te le ghe mai sentie. Prova a pensare che la sia compagnà co la chitara da uno bravo, che crea dele atmosfere che te resti imagà. Eco, quando che te si riuscito a imaginarte tuto te ghe na idea de quello che xe sta venare 23 febraio da Pessati e si ca te ghea avisà che saria sta on pecà perdare na serata cossi.

## Tira on garbinelo

————— El Mestro

Tira on garbinelo  
che taja le rece,  
ma l'aria  
la xe de on celeste mai visto!  
Basta stare qua,  
in mezo a ste montagne,  
soto sto cielo  
che'l pare de véro,  
par sentirse piccoli,  
par sentirse grandi,  
par sentirse vivi.

## La Fenice di Venezia




Erri Andrea direttore Generale de la Fenice

## Uno sguardo dietro le quinte

————— Tomaso

“El pì bel teatro del mondo, so la città pì bela del mondo”, questo ga dito el maestro Myung-Whum Cghung ala fine del concerto de Capodanno, da elo direto. Ma el pì bel teatro al mondo el gavarà pure on responsabile de tuto queo che ghe gira intorno, uno che coordina e che fa funzionare anca soto l'aspetto economico finanziario, le attività de sto prestigioso sito. El sogeto in question el xe el Direttore Generale. El direttore generale de la Fenice de Venezia se ciama **Erri Andrea** che **Sabo 24 Marzo 2018 ale ore 21 sarà ospite all'Osteria Pessati**, Inutile dire che l'incontro co Andrea la xe na ocasion da no perdare. Tema de la serata “Uno sguardo dietro le quinte”. Podemo solo immaginare quello che succede de drio al palco de na qualsiasi esibizion artistica. La curiosità xe tanta e la sarà sicuramente sodisfata. In atesa de sto grande evento culturale, preparemose a farghe qualche domanda al direttore so la storia de La Fenice de Venezia.

## Solesino Toto o Totò Elezioni



Xe proprio vero, in Italia gavemo tante Elezioni, cioè votemo massa volte. Ghe se qualcun che ga passà pi tempo a scuola par votare che no par studiare. In sti ultimi ani, co i “social network” tuti pole tore in giro tuti quei che se candida, quasi che ghe fusse da votare contro qualcuno pì tosto che prò qualcun altro. Se po i candidati se tanti la fortuna vole che vinze uno solo. Nonostante questo xe importante ‘ndare a votare, zercando de votare la persona mejo, no solo prima de le elezion, ma mejo dopo le elezion.

**Votantonio  
Votantonio  
Votantonio  
Votantonio**  
Tusi: qua bisogna sbassare i  
Tony

### A l'ospedale

Essare a l'ospedale apena operà no xe belo, avere du amighi che vien catarte xe belo, che dopo i du amighi in ostarìa i te daga par morto, capita solo da Pessati.



## Grande successo

La mostra de 45 giri che ghe xe stà a fine ano in Ostarìa da Pessati la xe sta visità da tantissime persone che vardando e scoltando le canzon de la so gioventù par qualche minuto i ga fato on salto indrio nel tempo.

## Elettori di Solesino

Anno	2018	1975
Abitanti	7.025	7.035
Elettori	5.597	4.817
Giovani	1.428	2218

## 790 Tusi de manco

Cesco

Sto ano a Suisin ghe xe 10 abitanti de manco del 1975. Ghe xe 790 tusi soto i 18 ani de manco de allora, pì de on terzo de manco. Na roba che IMPRESSIONA, no la xe na bea roba. La motivazion no la xe una sola; xe parchè se more pì ve-ci; xe parchè more manco tusiti de na volta; ma de sicuro parchè nasse manco tusi de na volta. Parchè? No lè on probrema solo de Suisin, ma mondiale, co l'aumentare del benessere se fa manco fioi. La crisi economica (sempre che dal 1968 al 1975 se stesse mejo de desso) la ga le so colpe, ma poche, Forse parchè se fa fioi pì tardi, forse parchè ormai no se se marida pì ma se se compagna. Zerto xe che aumentemo solo de ve-ci. Sol periodo breve se crea probremi co le pension e co la spesa par la salute, ma a la longa, quando che sta fato sarà pì stabile, se podaria anche stare mejo. Vedaremo fra 30 ani.